

古愚心言三

蘇子瞻
知夢
和

PDG

先考遺訓述

已未木蘭稿鸞笑錄本語刻本

已未秋先考病劇已而神復爽一夕命炷香正容危坐
召不孝鵬曰兒坐語汝跽而泣先考曰坐而言起而行
泣毋庸也母跪命至再侍立又命坐先考乃訓曰兒知
爾父少而苦長而辛勞老而敬慎若不逮乎爾祖大叅
之子都運之孫督學之曾孫版部之元孫也爲名公子
餬其口於四方爾父年二十四始授室還記幼時青衫
布履肘踵尚及見食於兄嫂間貧也饑寒內忍困而失
學比及爾母糟糠始學帖括囊螢引錐雖無補然亦粗

知大義及爾祖以英德外翰爲陽山明府爾長伯隨之
官爾父未嘗一日從曾手稟曰昔揭陽大叅之所宰也
廣人遺愛父與諸伯父貧如故今父宰陽山不肖甘食
貧報曰而真清白子孫也比而粵東直指出都門爾祖
同懷姪給諫公餞不齒及直指至以老勒罷職抵里不
自存歲餘逝言之有餘痛也不孝鵬起而拜曰謹識之
矣又訓曰爾父上有諸兄仲氏叔氏季氏文學齊名咸
無祿爾父事仲踰年侍寢嘗藥剖股肉爲糜嘗禱於
關聖殿大慟殿上冽冽有聲仲歿爾父抱於手蟣虱可

以待待至寓趣口誦誦畢命茶又趣膳殊批淋漓痛飲
酒榜落又痛飲酒吾愧賢賢吾不忌親親也使爾父當
日得售後棄帖括終老尚得名隱逸今署處士不過一
灌園叟雖然身隱矣又焉文何知身後名也不彥鵬起
而拜曰謹識之矣先考喟然嘆有頃乃訓曰昔太守高
公郡試拔才士大夫薦人二十四金給諫公以左司馬
予告爾族叔伯燕與爾父貧賤同學強至柳塘畔圃索
薦左司馬曰毋虛擲爾父大惶愧徑去其後高郡守放
榜填號薦者號字小書拔者大書爾父與爾族叔伯燕

俱大書連名前矛嗟乎老大蹉跎一無可恃欲汝曹聞之教子愼努力不孝鵬起而拜曰謹誌之矣又訓曰凡恩不可忘者也怨可忘戊子山寇蔡某始至吾家屯如蟻爾外舅祖戴公亦甫之甥丘某被寇拷夜自解縛走有中爾父以釋縛者寇大掠時爾兄弟單衣戰栗以草代被旣而寇大悔明言中爾者爾家某也爾父絕口不言其年師至攜爾兄弟入城次年城圍爾母以爾四伯母及爾從兄絕糧危城減餐飼之終俱斃爾母子四人與爾伯母兄二人潛出南關將歸錢塘祖居我入自外


虛室無人亟與爾外舅祖亦甫追近東坡遇寇泣走爾
母子遇寇盡驅而殺之有蟻某者救而免某卽某姓巨
寇營丁寇嘗以弓影伺殺爾父者而救脫爾母子反出
自寇營生殺非人所能也顧生我者未可歸諸天蟻某
今無後鬼若敖又爾母子歸時巨寇某知以兒幼而慧
必殺爾爾聞寇至跳屋逃於族祖叔母床下兩日夜叔
母飼以餅餌兒幼尚能刺刺今叔母亦無後兩事兒記
與否不孝鵬再拜爾起曰謹識之矣又曰當爾母子之
歸也爾父聞道走藺箕遇寇拘執箕陽族人多厚奔告

爾母乞救於爾從姊夫文學吳某慨然走賊壘請而脫
爾父得逃吉蓼同懷妹婿王某家今文學亦無後爾從
姊守節死其鬼若敖爾記與否不孝鵬起而拜曰謹識
之矣又曰戊子城陷爾父從吉蓼潛至舍巨寇某又卽
知發卒圍室急奔無復之仍走吉蓼爾從而後自尋熟
識偕行十歲兒徒跣八九十里備嘗艱險出死入生憶
其時麥五兩一石爾父自磨麴作糜漿夜寢濕鹵席地
無床蹬斗室如囚爾父爲人作畫畫一袍購大麥一觔
八兩父子減一餐濕鹵不寐與兒談患難窮愁文章節

義事兒記與否寇退吾父子返始學躬耕嘗自割麥日
烈兒持大葵扇隨子匍顧而止不去爾母掃落葉代薪
爾負筐隨憶過祇園人家留飯不下咽持哺爾爾以粗
糲棄弗食爾母泣加爾以夏楚兒愠其日爾從江姐丈
龍門課爾父請爾姐丈圈以硃墨兒喜是夕飯訖兒一
飯爾父一淚抑以見一飯之難也不孝鵬起而拜曰永
思艱謹識之矣又曰爾大父雖仕無田不祭爾父大父
從野公歷仕中外贈左司馬清白供簞豆而已爾父曾
大父高大父督學都運二公暨版部慈菴公合祀錢塘

清德祠歲時伏臘不掩豆吾九世祖足翁公爲吾家錢
塘始祖祭亦無田爾父以躬耕櫛沐積薄園薄田若干
畝餉予口今以其半爲吾父母蒸嘗以其半蒸嘗爾父
母以視版部督學都運諸祖則已過矣然願兒蘋藻式
恭水木倍篤也足翁公祠風雨鳥鼠爾父經營良苦今
僅垣墉兒念與否不孝鵬起而拜曰謹識之矣又曰爾
十八歲前爾父母尚含哺刻刻在懷嗣後兒志四方動
睽違惟甲寅乙卯丙辰三歲遭亂兒僵臥不下床父子
依依兒絕粒幾忘爾父母也爾父不忍強爾以生今幸

不死爾其恪遵祖訓世篤忠貞恨爾父不及見也有頃
又嗚咽曰兒爾近前爾上有諸兄皆殤及兒之誕最晚
甫七日有歆器將墜恐兒悸爾父盛以手弗及以足足
外臙擲見血肉疤痕尚可捫兒爾手自捫之語未終大
嗚咽不復續不孝鵬失聲痛哭曰昊天罔極伏地不能
起頃之先考呼之起扶就寢伺睡秉燭濡毫含淚而畧
爲述



先考遺命述

己未木蘭稿

嗚呼不孝初聞遺訓時望先考痊可而不忍復請及此
稱遺命先考與不孝父子永訣語先考語無上事喟然
嘆有志而未逮欲語又嘿不孝泣而請先考又嘆行與
兒別矣吾忘之而未逮兒勉之日視至三不孝請至三
日第言之兒能行忍不行兒不能行忍不勉於行先考
首以錢塘宗祠祀事命不孝曰吾兒幼時吾置兒膝上
每語此昨言之而未盡也吾家如宋南渡時祭酒特魁
文學孝子列祖皆未有祀以足翁公卜居錢塘遂稱錢

塘始祖始祖爾父九世祖也無田不祭雨露霜露之感
寂然也吾志少得購田爲春秋蒸嘗禮大夫始有家廟
始得行春秋祭禮吾志圖始祖以像以仁房贈督學公
義房贈郎中公圖像侍配自仁義禮智四房二世祖炤
常以主自贈公而下子孫以爵貴以子貴昭穆置主兩
序春秋得與饗親親尊尊貴貴賢賢愛以敬將禮以義
起也本日祠內先設香案講讀

聖諭子姓聰聽月朔望亦然司講者歲購供膳穀參石此
一事也次以錢塘宗祠命不孝曰足翁公祠漂搖幾墮

吾經營垣墉獨瘁昨言之而未盡也吾志在重新志在
式廓中堂以瓦以漆以堊以塹東西廂舊木土墻參差
欹側吾志易以扇易以杉與椽外護以磚俾勿壞西廂
寄祀木主遷入別祠位置吾志將東廂作室圖吾父吾
祖吾曾祖高祖吾太高祖以像簪笏蟬聯每歲春秋吾
本支子孫自設祭薄購祀租拾石另載清遺祠祠規此
一事也復次以資聖禪林另構一祠命不孝曰錢塘爲
吾家科甲發祥之鄉也資聖禪林久護東偏先倡建後
殿殿成遭風而圯卜復興吾志於東偏上捨地爲方丈

一僧房二庫房一香積一易西偏二間爲一復聽經處
吾又志於東偏下捐地庀工構祠三室一祀闔族無嗣
者一祀江南粵東及散處始遷之祖父一祀吾外父及
爾外父吾外父文學吉甫戴先生孝子也爾外父文學
千甫黃君吾心友也三室各置主入龕祠顏曰義薄購
租拾石付主僧中元禪林例設道場炤木主給牒齋品
楮錢取諸子粒元旦上元燃燈供香燭茶酒其先寄主
宗祠悉遷義祠內此一事也復次以義學命不孝口族
之盛也以詩書吾志建義學於錢塘亦購薄租拾石佐

闔族子姓延師此又一事也若寶林青山祇園等處封
塋應修清德祠永思堂祀典弗備吾志之而未逮昨與
兒言盡之矣語畢目視不孝又至三隨語清貽祠蒸嘗
謂此吾父母血食也吾躬耕作苦所積園田僅供蘋藻
兒勉矣吾何憂語畢張口而號有聲淚不出再請不復
言旣三日卒卒後百日不孝泣血稽顙向先考半影滴
血而錄諸膺

